

ԱՆԴԱՐՁ ՃԱՄՓՈՐԴՆԵՐ

Իմ անցած կյանքն ու հին տարին,
Երկու անգոր ծերի նըման,
Զըրույց տալով գընում էին
Դեպի աշխարհն հավերժական:

5 Մինն ասում էր.– Ես ունեի
Թարմ ու բուրյան ծաղիկներ,
Ու բոլորը մարդկանց տըվի
Գարնան գըրկովն առատաբեր:

Մյուսն ասում էր.– Ես ունեի
10 Շատ ըզգացմունք ու կորով,
Ու ողջ ես էլ նըրանց տըվի
Սիրանըվեր երգերով:

Մինն ասում էր.– Ես թողեցի
Զըմե՛ն ու սև՛ էն հովտում:
15 Մյուսն ասում էր.– Ես թախծալի
Մի սիրտ բեկված ու տըրտում:

Մինը ասավ.– Բայց կըծաղկի
էն հովիտը նորից նոր:
Մյուսը էստեղ ոչինչ չասավ,
20 Ու գնում էր գլխակոր...

էսպես իմ կյանքն ու հին տարին,
Երկու անգոր ծերի նըման,
Զըրույց տալով գընում էին
Դեպի աշխարհն հավերժական: